

UNTUK SIARAN SEGERA



KEMENTERIAN PENDIDIKAN

KENYATAAN MEDIA

**KPM MENJUNJUNG TITAH KDYMM SERI PADUKA BAGINDA
YANG DI-PERTUAN AGONG UNTUK MEREVOLUSIKAN PENDIDIKAN**

Kementerian Pendidikan (KPM) merafak sembah menjunjung kasih atas Titah Kebawah Duli Yang Maha Mulia (KDYMM) Seri Paduka Baginda Yang di-Pertuan Agong XVII Sultan Ibrahim Ibni Almarhum Sultan Iskandar berhubung keperluan untuk merevolusikan pendidikan dengan memberi tumpuan kepada elemen kemanusiaan, moral, kawalan emosi dan kesedaran undang-undang.

Titah KDYMM Seri Paduka Baginda Yang di-Pertuan Agong menjadi peringatan kepada seluruh warga KPM untuk meningkatkan usaha bagi reformasikan pendidikan negara dengan memberi tumpuan khusus kepada aspek pembentukan karakter murid di peringkat sekolah.

Pada waktu ini KPM sedang membangunkan Pelan Pembangunan Pendidikan Malaysia (PPPM) 2026-2035 dan Kurikulum Persekolahan 2027 yang akan bermula dengan prasekolah pada tahun hadapan.

Pembentukan karakter diberikan tumpuan sebagai salah satu inisiatif utama dalam Kurikulum Persekolahan 2027. Pelaksanaannya akan menjadi anjakan strategik bagi memperkasa pembangunan sahsiah dan nilai murni murid secara berstruktur.

Inisiatif sokongan lain seperti Penghayatan Hadis 40 Imam Nawawi dan Program Generasi MADANI (GenMADANI) juga dilaksanakan bertujuan untuk meningkatkan akhlak, adab dan sahsiah diri murid.

Keprihatinan KDYMM Seri Paduka Baginda Yang di-Pertuan Agong terhadap isu yang berbangkit menjadi panduan kepada Kementerian untuk terus memperkukuhkan aspek pembangunan karakter dan kesejahteraan murid.

TAMAT

**KEMENTERIAN PENDIDIKAN
22 NOVEMBER 2025**